



ATASSUT

22. MAJ 2020

Siverth K. Heilmann

UPA 2019/38

Kommunik aqqissusseqqinneq nalilersortariaqalenera pillugu apeqquteqaat aallaavigalugu oqalississiaq.

(Inatsisartuni ilaasortaq Aqqalu C. Jerimiassen)

Inatsisartuni ilaasortaq, Aqqalu C. Jerimiassen Atassut, Kommunik aqqissusseqqinneq nalilersueqqittariaqalernerput pillugu apeqquteqaat aallaavigalugu oqalississiaqarninnut soqutiginaru-mut qujanaq, imatullu Atassut-miit oqaaseqarfigissavarput.

Kommunerujussuannngortitsinerup kingorna, aali oqaatsit ilaannai innuttaasut politikkerillumi suaarutigineqartartut ilisarnarluinnartut tusartuakkagut, oqallisiaqartup tunngavilersuutimi tikippai, pinngitsooranilu nutaamik nalilersuisoqarnissaa ujartorlugu, taamatullu nalilineru Atassut-miit taperserlutigu.

Nassuerutigisariaqarparput Kommunit kattutsinneqarnissaannut isumalioqatigiissitap piffissami sivittajaami innuttaasut politikkerillu nalilersuinerat tamakkiisumik isumaqatigiiffiusimannginnera, taamaattorli kommuunet aggulunneqarnera 1. Januar 2009-imi inatsisartuni atuutilersipparput.

1989-imi kommunalbestyrelse-mi inatsisartunilu 1995-imi misilittagaraarput aningaasarsiorneq Kommunene assigiinneqisoq. Inatsisartut aqutugalugu sanaartugassanut aningaasarissaarnerit aningaasaleeqatigiilluortarput, akissaqannginnerusulli ilaatigut tamakkiisumik tapeeriaatsilluunniit assigiinngitsut atorlugit aningaasaliiffineqartarlutik. Kanukoka ingerlalluarallarmat kommuunet sullinneqarnerat isoriinnagassaasimannginnera puujorneqanngilaq.

Kommuunet kattussuunnissaannut suliap ingerlannerani, amerlanerussuteqartuniit nunaqarfinni qinikkat atorunnaarsinneqarnissaannik anguniagaqaralarput. Tamanna Atassut-miit assut akerlerineqarpoq kattussuunniarnermillu aalajangernissaq kinguartikkusussimagalarlugu.

Nunaqarfinnili aqutsisutut qinikkatut ingerlaannarsinnaanerit inatsisartuni akuerineqarpoq ilami aamma 2017-imi najukkami illoqarfinni tamani najukkami ataatsimiititalianik pilersitsisoqarluni.

Naalagaaffeqatigiinnermik Atassut illersuisuugaluarluta, Qallunaat Nunaannisulli ajornaatsigisumik Kommuunet kattussuunnerasulli, nunarujussuatsinni isorartoqisumilu immitsinnut tikeriaannaanata aqqissuussisinnanatalu Atassut-miit ilisimavarput, taamanikkulli Naalackersuisooqataagaluarluta innuttaasut politikkerillu amerlanerussuteqartut isumaat malinniarsimavarput.

Ilami kattussuunnerup kingorna, Kommuunet, Inatsisartuni Naalackersuisunilu partiit tamavitta, pitsaaqutit ajoqutillu pillugit, Aqqalu Jerimiassen-ip illoqarfiit ilaannaani ineriartortitsisoqarneranik ineriartortitsinnginneranilluunniit, innuttaasut uparuartuutaannik apuussaqaarnera piviusuusoq, qangatut kommuunet utertissavagut imaluunniit aggulussimanerput pillugu amerlanerulissaaguut?



Atassutip Qaasuitsup Kommuniugallarmat angivallaarujussuartutut isigalutigu minnerpaamik ataatsimik marlunnilluunniit suli avinneqarnissaa anguniarsimavarput. Kommune-mi Qeqertalik pilersinneqarpoq, neriunniartali aamma nunatta sinnerani nalilersuinigut kinguneqarluartumik pitsaasumillu oqallinneq ingelajumaartoq.

Inuussutissarsiutitta pingaarnersaat aalisarneq, aningaasarsiornerpullu allanngoraqisoq killeqaqaaq. Naalagaaffimmiit akisussaaffiit 30 miss suli tigunngisaat il il. Kattussuunnermi inatsisartut Naalackersuisutigoortumillu akisussaaffipassuit inissiarpassuit isasuulersut ilanngullugit kommunenut tunniussuunniarpagut. Allaffissorneq annikillisarniarneqaralarpoq, avinngarusimanerusuni innuttaasut pilliutigineqarput, illoqarfiit pingaarnersaat Nuuk suli inissaaleqiffiulluni aqunneqarsinnaanngiusattumik nutserfiuvoq.

Qeqqata Kommunea Sisimiut Maniitsorlu kisiartaallu illoqarfiit marluinnaalluta nunaqarfittagut ilanngullugit kattunnuuvugut. Iluarusuttoqarlunilu naammagisimaarinnittoqanngilaq aammalu kattussimanerput pillugu akerliulluinnartoqarluni. Aap qinikkat akornanni sapinngisarput tamaat ingerlalluarnissarput kissaatigisarparput, taamaakkaluartorli Maniitsumi aningaasaliissutaasartut annikinnerusarneri pillugit uparuarneqallattaasaqagut.

Atassutip kommunemi inatsisartunilu sulinitinni, inuussutissarsiornerup aningaasarsiornitalu sulisoqarnikkullu sukkanerusumik siuariartornissamat periarfissanik aqqutissarsiuussisarnerput paasineqariartuinnarmat nuannaarutigaarput, ilanngullugulu aaqqittariaqartutut tikkuartakkagut kingusikkaluamik paasineqalernerat. Tassa Atassut.

Taamatut oqaaseqarluta oqallisissiaqartumut qujaqqippugut, oqallilluarnissamillu kissaallusi.